

智覺禪師定慧相資歌

祖教宗中有二門十度萬行稱爲尊初名止
觀助新學後成定慧菩提根唯一法似雙分
法性寂然體真止寂而常照妙觀存定爲父
慧爲母能孕千聖之門戶增長根力養聖胎

郭五

三十一

念念出生成佛祖定爲將慧爲相能弼心王
成無上永作群生證道門即是古佛菩提樣
定如月光燦外道邪星滅能挑智炬轉分明
滋潤道芽除愛結慧如日照破無明之暗室
能令邪見愚夫禪盡成般若波羅密少時默

刹那靜漸漸增脩成正定諸聖較最功不多
終見靈臺之妙性瞥聞法纔歷耳能熏識藏
覺種起一念回光正智開須臾成佛法如是
禪定力不思議變凡爲聖刹那時無邊生死
根由斷積劫塵勞巢穴願湛心水淨意珠光

吞萬像燦千途扶開已眼無瑕翳三界元無
一法拘覺觀賊應時剋攀緣病倏然淨蕩念
垢弓洗惑塵顯法身弓堅慧命如斷山若停
海天翻地覆終無改瑩似琉璃含寶月倏然
無寄而無待般若慧莫能量自然隨處現心

光萬行門中爲導首一切時中稱法王竭苦
海碎邪山妄雲卷盡片時間貧女室中金頃
現壯士額上珠潛還斬癡網截欲流大雄威
猛更無儔能令鐵牀銅柱冷頃使魔怨業果
休和諍訟成孝義普現群生諸佛智邊邪惡

慧盡朝宗螻蟻鯤鵬齊受記偏脩定純陰爛
物剋正命若將正慧照禪那自然萬法明如
鏡偏脩慧純陽枯物成迂滯須憑妙定助觀
門如月分明除霧翳勸等學莫偏脩從來一
體無二頭似禽兩翼飛空界如車二輪乘白

牛即向凡途登覺岸便於業海泛慈舟或事定制之一處無不竟或理定唯當直下觀心性或事觀明諸法相生籌筭或理觀頓了無一無那畔定即慧非一非二非心計慧即定不同不別絕觀聽或雙運即寂而照通真訓或俱泯非定非慧超常準一塵入定衆塵起般若門中成法爾童子身中三昧時老人身分談真軌能觀一境萬境同近塵遠刹無不通真如路上論生死無明海裏演圓宗眼根能作鼻佛事色塵入定香塵起心境常同見自差誰言不信波元水非寂非照絕言思而寂而照功無比權實雙行闡正途體用更資含妙旨勸諸子勿虛棄光陰如箭如流水散亂全因缺定門愚盲祇爲虧真智真實言須入耳千經萬論同標記定慧全功不暫忘一

念頓歸真覺地定須習慧須聞勿使靈臺一點昏合抱之樹生毫末積漸之功成寶尊彌猴學定生天界女子纔思入道門自利利他因果備若除定慧莫能論
智覺禪師定慧相資歌